

Success per las petiziuns dal parlament da mattas

Oz mardi, ils 11 da zercladur 2013 vegn il cussegl grond a tractar, durant la sessiun da zercladur, las petiziuns dal 1. parlament da mattas dal Grischun. Las cummissiuns predeliberantas proponan d'acceptar la petiziun per mauns da la regenza.

Il 1. parlament da mattas dal Grischun dals 8 da november 2012 ha deliberà duas petiziuns per mauns dal cussegl grond. L'emprima petiziun pretenda che l'abunament general grischun saja mez gratuit per tut ils giuvenils. La segunda petiziun pretenda ch'i dettia en mintga scola ina persuna da contact qualificada per cusseglar las victimas dal cybermobbing.

Tant la cummissiun per ambient, traffic

ed energia sco er la cummissiun per furmaziun e cultura recumondan al cussegl grond d'acceptar las duas petiziuns per mauns da la regenza per ch'ellas possian vegnir elavuradas vinavant. Las propostas laschan presumar ch'ils dus giavischs èn vegnids prendids serius en las cummissiuns ed han chattà bainvulientscha e consentiment.

Quai è in grond success. Betg mo per las petizunarias, mabain per il 1. parlament da mattas dal Grischun. La debatta parlamentara davart las petiziuns metta ils giavischs da personas giuvnas en l'interess public. Ed ella mussa a las participantas dal parlament da mattas ch'ellas han lantschà cun success in process politic.